

दिनांक 10.07.2024

समय: 18.45 बजे

आकाशवाणी जयपुर-अजमेर प्रादेशिक समाचार ।

- राज्य रो माली साल 2024-25 रो पूरो बजट विधानसभा मांय पेश करी ज्यो-4 लाख 86 हजार 615 करोड़ रूप्या रा खर्च रो अनुमान ।
- ईलाज रा हलका सारु 27 हजार 660 करोड़ अर खेती-बाड़ी सारु 25 हजार करोड़ रूप्या रो प्रावधान -लैण्ड टैक्स खत्म करी ज्यो ।
- बजट माथे मिलीजुली प्रतिक्रिया-सत्ता पक्ष बजट ने सगळं ने सागे ले र चालण वाळो तो विपख दिशाहीन बतायो-नौजवान बजट मांय करी ज्या ऐलाण ने उमाव बधावण वाळा बताया ।
- प्रदेश मांय कठे-कठे भारी बारिश-जयपुर, दौसा, अजमेर, भीलवाड़ा जिलां सारु ऑरेन्ज अर 19 जिला सारु येलो अलर्ट जारी करी ज्यो ।

000

माली साल 2024–25 रा राज्य रा बजट मांय 4 लाख 86 हजार 615 करोड़ 10 लाख रूप्या रा खर्च रो अनुमान लगायी ज्यो है। उपमुख्यमंत्री अर वित्त मंत्री दिया कुमारी आज विधानसभा मांय बजट पेश कीनो। वे भाषण मांय कह्यो के बजट अनुमानां रे मुजब खर्च 2 लाख 82 हजार 247 करोड़ 65 लाख रूप्या अर आमदनी 2 लाख 58 हजार 378 करोड़ 29 लाख रूप्या रहवण री संभावना है। बजट मांय राजस्व घाटो 23 हजार 869 करोड़ 36 लाख रूप्या रहवण रो अनुमान लगायी ज्यो है। राज्य रो राजकोषीय घाटो 67 हजार 240 करोड़ 48 लाख रूप्या व्हेवण रो अन्दाजो लगायी ज्यो राज्य रा सकल घरेलू उत्पाद ःळक्वद्ध रो 3 दशमलव 95 फीसदी रहवण री संभावना है।

वित्तमंत्री बजट भाषण मांय शिक्षा, स्वास्थ्य, रोज़गार, सड़क विकास अर खेल समेत न्यारा–न्यारा हलकां सारू ऐलाण कीना। वे कह्यो के राज्य ने साढे तीन सौ बिलियन डॉलर री माली व्यवस्था बणावणो तैय करी ज्यो है। वित्तमंत्री कह्यो के राज्य सरकार आवता पांच साल मांय चार लाख भर्तियां करणो तैय कीनो है। वे ई साल सारू भर्तियां रो लक्ष्य 70 हजार ऊं बधा र एक लाख करण रो ऐलाण कीनो।

.....
वित्तमंत्री बजट भाषण मांय प्रदेश मांय पाणी ऊं जुड़ी छह नुवी परियोजनावां चलावण रो ऐलाण कीनो। वे कह्यो के राज्य रा पांच हजार 846 गांवां मांय पांच हजार करोड़ रूप्या रा खर्च ऊं पीवण रा पाणी ऊं जुड़ी योजनावां सरू करी जावेला। विद्युत तंत्र री मज़बूती सारू ऊर्जा रा भंडारण री नुवी नीति लाई जावेला। वे कह्यो के कुसुम योजना रा तहत तीन हजार मेगावॉट बिजली उत्पादन सारू लेटर ऑफ इंटेंट जारी करी ज्यो है। वित्त मंत्री कह्यो के राज्य रा 2 लाख घरां मांय बिजली रा कनेक्शन दिया जावेला। प्रदेश मांय ईलाज रा सुबीतां ने बधावो देवण सारू बजट मांय 27 हजार 660 करोड़ रूप्या रो प्रावधान करी ज्यो, जो कुल बजट रो करीब सवा आठ फीसदी है। वित्त मंत्री हर विधानसभा हलका मांय एक–एक आयुष्मान मॉडल सीएचसी खोलण रो ऐलाण कीनो। वे आवता बगत मांय राजस्थान डिजिटल हैल्थ मिशन सरू करण रो ऐलाण ई कीनो। इण रा तैत ऑनलाइन तरीका ऊं मरीजां री ईलाज ऊं जुड़ी जाणकारी हिफाजत सागे राख्यी जा सकेला।

वित्त मंत्री राज्य मांय डॉक्टरां रा डोढ हजार अर नर्सिंग कर्मचारियां रा चार हजार नुवा ओहदा बणावण रो ऐलाण ई कीनो। वे पुलिस महकमा मांय ई साढे पांच हजार नुवा ओहदा बणावण रो ऐलाण कीनो। राज्य मांय आवता साल ऊं ग्रीन बजट ई पेश करण रो ऐलाण कीनो। पर्यावरण ने बचावण रा उपायां रो जिकर करता थकां वित्त मंत्री वे हरयो—भरयो राजस्थान बणावण रा मकसद ऊं **मिशन हरियालो राजस्थान** सुरू करण रो ऐलाण कीनो। ई सारू पांच साल मांय चार हजार करोड़ रुप्या खर्च कर र न्यारा—न्यारा काम कराया जावेला। वे 2 हजार स्थानीय नागरिकां ने वन मित्र लगावण रो ऐलाण ई कीनो। गांवाई हलका मांय महिलावां री जिंदगी बेहतर बणावण सारू चलायी ज्यी लखपति दीदी योजना रा तहत राज्य मांय 15 लाख लखपति दीदी बणावणो तय करी ज्यो है। वे दिव्यांगजन सारू दो हजार स्कूटी देवण रो ऐलाण ई कीनो। बजट मांय स्वतंत्रता सेनानियां री पेंशन पचास हजार ऊं बधा र साठ हजार रुप्या करण रो प्रस्ताव करी ज्यो।

राज्य रा छात्रावासां मांय विद्यार्थियां सारू मैस भत्तो तीन हजार रुप्या करण रो ऐलाण बजट मांय करी ज्यो। वित्त मंत्री प्रदेश मांय स्टार्टअप ने बधावो देवण सारू अटल एंटरप्रेन्योरशिप प्रोग्राम चलावण रो ऐलाण ई कीनो। दीया कुमारी प्रदेश मांय पचास नुवी प्राईमरी स्कूलां अर हर संभाग मांय बालिका सैनिक स्कूल खोलण रो प्रस्ताव कीनो। वे हर विधानसभा हलका मांय पांच—पांच नुवा आंगनबाड़ी केन्द्र अर जनजातीय हलकां मांय अढाई सौ नुवा मां—बाड़ी केन्द्र खोलण रो ऐलाण कीनो। दीया कुमारी एक अप्रैल 2024 पाछे कर्मचारी हित री ग्रेच्युटी री हद 20 लाख ऊं बधा र 25 लाख रुप्या करण रो प्रस्ताव कीनो। वे जयपुर रा एसएमएस स्टेडियम मांय अल्ट्रा फिटनेस सेंटर बणावण रो ऐलाण ई कीनो। वित्त मंत्री महाराणा प्रताप स्पोर्ट्स विश्वविद्यालय खोलण रो प्रस्ताव ई कीनो। वे जयपुर हवाई अड्डा माथे नुवो टर्मिनल बणावण रो ऐलाण कीनो।

पर्यटन हलका रो जिकर करता थकां दीया कुमारी कह्यो के प्रदेश मांय नुवी पर्यटन नीति लायी जावेला। वे खाटूश्याम जी धाम रा विकास रा कामां सारु एक सौ करोड़ रुप्या रा प्रावधान करण रो ऐलाण कीनो। ई सागे ई न्यारा—न्यारा अभ्यारण्यां मांय ईको टूरिज्म ने बधावो दियो जावेला। दिल्ली रा भारत मंडपम री भांत जयपुर मांय राजस्थान मंडपम बणायो जावेला। रोडवेज रा बेड़ा मांय पांच सौ नुवी मोटरां शामिल करी जावेला। रोडवेज मांय बिजली ऊं चालण वाळी तीन सौ बसां शामिल करी जावेला। वित्तमंत्री रोडवेज मांय एक हजार 650 ओहदां माथे भर्तियां करण रो प्रस्ताव ई कीनो। वे राज्य मांय 2 हजार 750 किलोमीटर लम्बा नौ ग्रीनफील्ड एक्सप्रेस वे बणावण रो ऐलाण कीनो। दीया कुमारी हर संभाग मुख्यालय माथे रोड सेफ्टी टास्क स्क्वाड बणावण रो ऐलाण ई कीनो। हाईवे माथे हादसां रा शिकार व्हेवण वाळां री तुरत मदद रा मकसद ऊं 25 लाइफ सपोर्ट एम्बुलेंस लगायी जावेला। बजट मांय महिला स्वयं सहायता समूहां ने अढाई फीसदी ब्याज री रेट ऊं कर्ज मुहैया करावण रो ऐलाण करी ज्यो। वे हर जिला मुख्यालय माथे हैलीपेड बणावण रो प्रस्ताव कीनो। वित्त मंत्री बेहतर पत्रकारिता सारु बिशन सिंह शेखावत पत्रकारिता पुरस्कार रो ऐलान कीनो। वे अधिस्वीकृत पत्रकारां ने आरजीएचएस सुबीता रो फायदो देवण रो ऐलाण ई कीनो। वित्त मंत्री सरकारी स्कूलां रा 8वीं, 10वीं अर 12वीं कक्षा रा बोर्ड रा इम्तिहान मांय राज्य अर जिला स्तर री मेरिट लिस्ट मांय नाम लावण वाळा 33 हजार विद्यार्थियां ने ऊंची भणार्ई सारु तीन साल ताई मुफ्त इन्टरनेट रा सुबीता सागे टेबलेट देवण रो ऐलाण ई कीनो। वित्त मंत्री न्यारा पेश करी ज्या कृषि बजट मांय किसानां सारु 25 हजार करोड़ रुप्या रो प्रावधान करण रो प्रस्ताव कीनो। वे किसानां ने पाणत सारु दिन मांय ई बिजली मुहैया करावण रो ऐलाण कीनो। मार्च 2024 तांई नी दिया ज्या बिजली रा कनेक्शन बेगा ई देवण रो ऐलाण ई बजट मांय करी ज्यो। दिया कुमारी राज्य मांय जैविक खेती ने बधावो देवण सारु ऑर्गेनिक एंड कनवेंशनल फार्मिंग बोर्ड बणावण रो ऐलाण ई कीनो। वे पांच हजार काश्तकारां ने डिगियां बणावण सारु सब्सिडी देवण रो प्रस्ताव ई कीनो। दिया कुमारी ईआरसीपी परियोजना ऊं रामगढ़ बंधा ने जोड़बा सारु 9 हजार 600 करोड़ रुप्या री माली मदद देवण रो ऐलाण ई कीनो। दिया कुमारी ईआरसीपी परियोजना ऊं रामगढ़ बंधा ने जोड़बा सारु 9 हजार

600 करोड़ रुपया री माली मदद देवण रो ऐलाण ई कीनो। वित्त मंत्री बजट भाषण मांय केई कर प्रस्ताव ई पेश कीना। वे राज्य राज्य मांय उद्यमिता, निवेश अर विकास ने बधावो देवण सारू एमनेस्टी योजनावां रो प्रस्ताव कीनो। आं योजनावां रो फायदो 31 जुलाई 2024 तांई लियो जा सकेला। वेट एमनेस्टी रा तहत अन्तरराज्यीय बिक्री रा मामलां, लंबित अर विवादित मामलां अर केवल ब्याज री मांग वाळा मामलां मांय बाकी रकम रो 10 ऊं 20 फीसदी तांई जमा करावण परां बच्योड़ी रकम माफ करण रो प्रस्ताव करी ज्यो है। स्टाम्प ड्यूटी री मांग रा मामलां मांय ब्याज अर पेनल्टी पूरी माफ करणो प्रस्तावित करी ज्यो। वित्त मंत्री लेण्ड टेक्स खत्म करण रो ऐलाण ई कीनो।

मुख्यमंत्री भजन लाल शर्मा आज पेश करी ज्या राज्य रा बजट ने जनता रा भला रो अर सगळां रो ध्यान राखण वाळो बतायो है। वे कह्यो के 'विकसित राजस्थान, समृद्ध राजस्थान' बणावण री दिशा मांय ओ बजट घणो खास साबित व्हेला। केन्द्रीय अर राज्य रा मंत्री ई बजट री सराहवणा कीनी है। केन्द्रीय संस्कृति अर पर्यटन मंत्री गजेंद्र सिंह शेखावत सगळां रा विकास रो बजट पेश करण सारू वित्त मंत्री दीया कुमारी ने शुभकामनावां दीनी। शेखावत कह्यो के

ने कहा कि भजनलाल सरकार का पहला पूर्ण बजट हर वर्ग के सपने पूरे होने की गारंटी है। ऊर्जा मंत्री हीरालाल नागर ने कहा कि समाज के हर वर्ग के कल्याण की मंशा के साथ लाए गए इस बजट में ऊर्जा क्षेत्र में व्यापक सुधार का रोडमैप प्रस्तुत किया गया है। बजट घोषणाओं से स्पष्ट है कि एनर्जी सेक्टर का कायाकल्प सरकार की प्राथमिकताओं में पहले पायदान पर है।

दूजी कानी राज्य रा पैली वाळा मुख्यमंत्री अशोक गहलोत बजट ने नीरस अर दिशाहीन बतायो है। बजट माथे प्रतिक्रिया देता थकां कह्यो के राज्य रा ई बजट मांय रो शिक्षा, स्वास्थ्य अर सामाजिक हिफाजत ऊं कोई सरोकार नी है। वे कह्यो के ई बजट ऊं ना तो जनता ने साता मिली है अर ना ही विकास रो कोई रोडमैप बण रह्यो है। प्रदेश कांग्रेस अध्यक्ष गोविन्द सिंह डोटासरा अर राज्य रा पैली वाळा उपमुख्यमंत्री सचिन पायलट राज्य री भजनलाल सरकार रा पहला बजट ने दिशाहीन करार देता थकां थोथी घोषणावां ऊं भर्यो बतायो।

डोटासरा खबरनवीसां सागे बातचीत करता कह्यो के बजट मांय सिर्फ किलां अर महलां री बातां है अर गांव, गरीब, ग्रामीण अर किसान री कोई बात नी है। डोटासरा राज्य री भाजपा सरकार माथे वां रा संकल्प पत्र मांय करी ज्या वायदा भूल जावण रो आरोप माण्ड्यो। कांग्रेस रा आला नेता सचिन पायलेट ई विधानसभा भवन रे बाहर खबरनवीसां सागे बातचीत करता थकां कह्यो के जनता ने ज्यां बुनियादी सुबीतां री जरूरत ही वां रा बारा मांय कोई ठोस जतन नी करी ज्या। वे कह्यो के प्रदेश मांय बिजली अर पाणी री घणी कमी है। पायलेट कह्यो के खेती— बाड़ी हलका ऊं जुड़या पैली रा ऐलाण ई पूरा नी कर्या जा सक्या है अर और नुवा ऐलाण करी दिया ज्या है। पायलेट कह्यो ई बजट ऊं जनता माथे कोई खास असर नी व्हेला। प्रदेश रा नौजवान बजट मांय नुवी युवा नीति लावण रा ऐलाण रो स्वागत कीनो है जद के पत्रकार वां ने आर.जी.एच.एस. रो फायदो देवण रा प्रस्ताव सारू वित्त मंत्री रो अभार जतायो।

000

प्रदेश मांय कठे—कठे ज़ोरदार मेह बरस्यो है। सब ऊं बत्ती 8 सेंटीमीटर बरसात बांसवाड़ा ज़िला रा बागीदोरा मांय व्ही। डूंगरपुर ज़िला रा गणेशपुर मांय 7 जद के चिखली अर गडरा रोड़ मांय 5—5 सेंटीमीटर बारिश व्ही। जयपुर मांय आज दोपहरां री बगत तेज बिरखा व्ही। जालोर जिला रा आहोर मांय झमाझम पाणी बरस्यो। मौसम विभाग आज जयपुर, दौसा, अजमेर अर भीलवाड़ा जिलां सारू ऑरेन्ज अलर्ट जारी कीनो है। आं ज़िला मांय कठे—कठे 30 ऊं 40 किलोमीटर प्रतिघंटा री रफ्तार ऊं बायरो बाजण सागे बिरखा व्हेवण अर बीजळी पड़बा रा आसार है। अलवर, भरतपुर, धौलपुर, करौली, टोंक, सवाईमाधोपुर, बूंदी, बारां, कोटा, झालावाड़, झुंझुनूं, चूरू, सीकर, नागौर, बीकानेर, चित्तौडगढ़, राजसमंद, उदयपुर अर पाळी ज़िलां सारू हल्की ऊं मझला दर्जा री बिरखा रो यैलो अलर्ट जारी करी ज्यो है।

000